

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗簾，同正對甜甜夢肚醒來个偈攞手；難得个放棄日，懶在眠床看日頭輕輕徒步、聽窗外鳥聲吱啁，時間也像恬恬頓腳咧，啊！這靚靚个朝脣。

食過朝，想去遶久無見面个朋友。自家駛車，時間斯在自家个手頭項，使得慢慢行、定定奈；經過鬧熱个街市，車輪慢慢轉入鄉道，來到苗栗个穀倉——灣裡。路个兩片脣，金黃飽米个禾串硬硬會對禾田淳出來；風吹來，一陣一陣歡喜去手攘腳踏、搖頭扭腰个金黃稻浪，實在還素絲。田脣企核兩個在比手畫腳个阿伯，日頭晟來，笠嬾下晒去烏刻刻个面項，單淨看著兩排雪白个牙齒，想來應該當滿意今年係好年冬啦！

幹過一個大彎幹，共樣係闊茫茫个禾田，直直透到山下；深深淺淺个黃襯核青青个田脣、綠綠个大樹，像係天公伯个調色盤，乜係這個豐收个季節正有个景色。該向有幾坵既經收撇早冬禾，準備愛過蒔二冬禾个禾田，田水清清清，將朗朗个藍天同白雲、田脣个樹同人家屋，明明明反映出來，斯像框在田脣做个相

框肚个相，實在有罅靚。這向堵好有一坵田當在割禾，紅色个割禾機在田肚緊行緊割，三、四個人在脣項搵手，無閒濟借；割禾機背後跔歸陣白鶴，有兜低頭絡食、有兜大步行尋食、有兜飛高飛低搶食，鬧熱濟借，這斯係禾田肚盡有生命力个畫面咧啦！

車慢慢溜入莊頭，伏在路脣个老狗牯看著車來，伸懶筋企起來拂尾，像迎接老朋友个樣。一個著花衫个伯姆跔在屋面前个菜園摘菜，菜園分屋蔭核、日頭旨有晒著，青荷荷个菜葉面還有露水，看來當萋、當錫人食款。兩個國小年紀个細阿倌，一儕慢慢踏鐵馬、一儕半行半走、手項還拗緊籃球，嘻嘻哈哈有講有笑愛共下去打球。這一路个光景，實在分人心情舒爽。

主人家款好一桌點心、地豆同瓜子，還有清香个高山烏龍茶，三、四個真久無見面个老朋友，天南地北講去毋知天合地。茶香、情醺，靚靚个日、靚靚个心情，這斯係簡單个幸福。

編號 2 號

【陂塘】許倩雯原作

用鏡頭記錄臺灣這片地土个導演齊柏林，坐在直升機頂對天頂看往下，形容桃園个陂塘斯像係「散落一地泥个水晶，金皙皙¹！」

兩隻白鶴一前一後在陂塘面頂飛過，白雪雪个身影倒映在平平个水面。水蓮花²對青青个水肚探出頭，細細蕊个黃花斯像天頂一瞞一瞞个星，靚都耐毋得。

立秋正過撇，陂塘斯飛來一陣準備愛過冬个人客！鬥腳鳥³水紅色个長腳，躡在淺水所在定定行，鳥背在水肚掃來掃去，無閒在該尋食。花囉花囉个細水鴨將頭那汨入水竇，屎肫孔去半天高。忽然間，一粒扁扁个石頭飛啊過來，嚇都這陣鳥被翼飛起。原來係陂塘脣，走來一陣細孺在該打水漂。坐在樹下擎緊釣槓个男人，大聲罵：「佢人在這釣魚，若這兜孤盲頭在該變麼个齣事，莫來這搞！」

月華跋上天頂，在水同地个合界，白鶴花⁴个清香跔緊夜風散開來。夜呱⁵醒咧，昏哆昏哆⁶个伸肱喊幾聲「嘎！嘎！嘎！」像烏鈕恁大个蛎蜃扭緊尾汨水，圓身既經生出四隻腳咧，在陂塘个一角尋所在上岸。蛇哥發現這在水肚跳出來个烏影，黏時對草竇趁啊出來，開始逐厥等！

有人將桃園喊做「千陂之鄉」，這裡肚像碗公樣，大大細細个陂塘，做下係人工挖出來个。先民在開墾个過程肚當艱苦，高不將挖陂塘來頓水蔭田。陂塘盡多个時節，有萬外個，也變做桃園特殊个地理景色。逐個陂塘都有佢自家个故事，當多人第一擺个汨水、第一擺个釣魚，都係在陂塘發生。

跔緊時代个流轉，桃園都市化个程度緊來緊高。有兜陂塘失撇蔭水个功能，一個一個分人屯撇，起做機場、學校，抑係公園。伸落來个陂塘，經過整理，嘎有新生命个延續，變做現代人休閒遶寮个好所在！

¹ 金皙皙：音 gim+ si^ˋ si^ˋ；金光閃閃。

² 水蓮花：音 shui^ˋ lien^ˋ fa+；臺灣萍蓬草。

³ 鬥腳鳥：音 deu^ˋ giog^ˋ diau^ˋ；高蹺鴿。

⁴ 白鶴花：音 pag^ˋ kog^ˋ fa+；野薑花。

⁵ 夜呱：音 rha^ˋ gua+；夜鷺。

⁶ 昏哆昏哆：音 fun^ˋ de^ˋ fun^ˋ de^ˋ；頭暈腦脹。

編號 3 號

【幸福个味瑞】黃美貞原作

老古人言：「食撇五月粽，被骨正上棟。」五月節正過撇，當晝開始天時斯熱都佇毋著咧，該載堵好係梅雨季節，落過雨、起風咧，將就同冷氣關撇，行到窗門脣感受熱天難得个涼風。除撇好運看著天邊靚靚个七彩天弓，還鼻得著打馬膠路¹分日頭炙過、分雨水打過了後，淡淡、香香个味瑞，臨暗頭窗門外背一陣一陣「撚撚伊——撚撚伊——」个蟬聲，順核清風傳入屋肚來。

偌恁起還細時節，熱燠燠个下晝頭，吾這兜姊妹會同隔壁鄰舍个細人伴共下搞，輒輒搞到斷烏，聽著阿姆開聲喊：「好轉來洗手食飯咧！」正盼得轉屋。

吾爸係客運司機，平常時愛輪班，因致總係暗晡頭八、九點正下班。當記得若係堵好該日無伸麼个飯菜，吾爸斯會自家煮麵食。逐擺看佢斯同蒜頭礮礮嚟、過剝去幼幼，滴一屑豆油還過香油，先放入碗公肚，續核同煮好个麵撈起來，水泌昇燥，正同麵倒到碗公肚，將麵並蒜頭、配頭攪昇勻，該央時若係聽著吾爸問：「有麼人愛食麵無？」吾這兜斯當暢，遽遽從入灶下，你一

口、偌一口，又賺著一餐香噴噴个大麵夜點心咧，食去飽餬餬，還幸福哦！吾爸將伸个飯菜間核伸無幾多條个大麵，自家儘採划落肚，斯恁泥過一餐。

又還記得，熱天臨暗頭洗好身腳，等到食飽夜，碗筷撿掙好，寫撇作業，看下電視，細人還細又好搞，差毋多到愛上眠床該下，又一身汗咧；毋過，頭擺屋家無恁好額，單淨有一個間房安有冷氣忒等。阿姆會早半點鐘同冷氣拘開來，等大家愛睡目該下，間房門打啊開來，涼沁沁个冷氣，還有阿姆拿去晒過日頭个被骨，散出香香个日頭味瑞，歸屋家人尖到兩頂眠床項，黏時斯睡落覺咧。

這幸福个滋味直直固在吾心肝頭，毋多知成人大漢、做人阿姆了後，偌正知「賺錢可比針挑笏，使錢可比水推沙。」正體會，爺哀頭擺辛苦畜大吾等恁多個細人、愛理一個家哪有恁該？毋過該愛擔个責任同義務，厥等一日都毋識放撇過。

¹ 打馬膠路：音 da`ma`gau+lu`；柏油路。